

# Johnathan tekad layak pusingan akhir

**Kuala Lumpur:** Penembak negara, Johnathan Wong Guanjie (**gambar**) tekad memastikan dirinya beraksi dalam pusingan akhir Sukan Universiti Dunia (Universiade) di Gwangju, Korea Selatan, bermula dari 3 hingga 14 Julai ini.

“Penampilan pertama saya di Universiade adalah di Shenzhen, China pada 2011 dan kali ini di Gwangju, dapat masuk final dan akan buat yang terbaik. Saya akan menggunakan pengalaman yang ada, yang ditimba sebelum ini untuk memberi saingan kepada penembak lain.

“Ketika di Shenzhen, saya masih muda dan persembahan pun bagaikan tidak menjadi. Kali ini saya bersedia dengan kemungkinan untuk bertemu dengan atlet prestasi tinggi ke-

rana apa yang saya tahu, China turut menghantar atlet kebangsaan mereka,” kata Johnathan yang kini menuntut di Universiti Putra Malaysia (UPM) di sini.



## Raih pingat perak di Singapura

Untuk rekod, penembak itu menampilkan keputusan cemerlang apabila di-

angkat sebagai pemenang pingat perak acara 10 meter (m) dan gangsa acara 50 m Air Pistol lelaki di Sukan SEA Singapura 2015.

Dalam perkembangan sama, anak didik Zamil Ahmad Murad itu berkata dia kini sedang dalam persiapan untuk melayakkan diri dalam Sukan Olimpik Rio 2016.

“Saya akan menyertai pertandingan Piala Dunia ISSF, Gabalam, Azerbaijan pada 6 hingga 16 Ogos ini dan Kejohanan Menembak Asia ke-13 di Kuwait pada 1 hingga 12 November ini.

“Sekiranya saya mampu lakukan tembakan yang baik di Universiade, ia akan memberi saya lebih keyakinan di Piala Dunia untuk merebut tempat ke Sukan Olimpik Rio.

“Beberapa kesilapan yang saya lakukan di Sukan SEA Singapura akan dijadikan pengajaran. Saya perlu positif, tidak lakukan kesilapan dan buat tembakan lebih baik,” katanya. - **Oleh Mohd Khairie Khalid**